

Communicaziun digl cumegn da Surses allas medias (Nr. 13-2021)

Surses: Amprema badigleida per igl pumtrack Lai Barnagn

Proximamaintg vign fatga l'amprema badigleida per la construcziun digl pumtrack ed areal da skate agl conturn digl Lai Barnagn a Savognin. Las lavours da construcziun duessan neir terminadas anc chest aton.

Antschatta settember vign igl conturn digl Lai Barnagn a Savognin occupo da tgavateras. Alloura antschevan numnadamaintg las lavours da stgavamaint per igl pumtrack inclus en percurs separo per unfants pitschens e principiants ed igl areal da skate.

Igl Cumegn da Surses scu patrung da construcziun e responsabel pigl project ò surdo las lavours correspondentas. Las lavours da construcziun duessen neir terminadas chest aton. La premaveira vignan alloura anc fatgas las lavours da conturn.

Schi tot vo scu planiso, vign igl stabilimaint mess an funcziun gio chest aton. Igl pumtrack inclus igl percurs separo per igls unfants pitschens ed igl areal da skate stattan alloura a disposiziun da tottas ouras alla publicitad e pon neir duvros ad agen risc.

L'avertura uffiziala è planisada per la premaveira 2022. Livio Cadotsch, president dall'Uniun pumtrack Surses dei: «Nous ischan impressiunos digl grond sustign digls noss sponsours e digl resung positiv dalla populaziun. Gugent lainsa angraztger percheigl cun ena festa d'avertura comunabla.» An collaboraziun cun igl cumegn ò l'Uniun Pumtrack Surses s'angaschea per l'amplificaziun digl project cun ena pista per unfants ed igl areal da skate. L'uniun vot cuvreir igls costs supplementars cun contribuziuns da sponsours e cun prestar labour cumegna.

Durant las lavours da construcziun aint igl conturn digl lai sarogl da chintar cun duple traffic. Causa dallas lavours pogl er adegna puspe dar disturbis da canera durant curtas fasas. Igl patrung da construcziun sa sprova pero da limitar chels disturbis schi fitg scu pussebel. Per eventuels disturbis ans stgisainsa e supplitgagn per tgapientscha.

Infurmaziuns ulteriouras davart igl project: www.valsurses.ch/pumtrack

Sclarimaints dattan Adrian Ballat, commember da suprastanza (telefonign 078 779 06 57) u igl mastral Leo Thomann (telefonign 079 405 96 73).

Tinizong, igls 31 d'avost 2021